

四庫全書

史部

欽定四庫全書

史部

皇朝通典卷

四十九  
五十一

編修<sub>臣</sub>李傳熊覆勘

總校官編修<sub>臣</sub>程嘉謨

欽定四庫全書

皇朝通典卷四十九

禮

吉九

祀

歷代帝王

名臣附

臣等謹按杜典有祀先代帝王一條於祠廟之外  
兼及陵寢茲從其例以次彙載伏惟

聖朝禮祀

歷代帝王既立廟於

京師春秋致享

聖祖仁皇帝詔定祭典上自伏羲下逮有明凡曾在位者

除無道亡國之君皆得奉主入廟增至一百四十

三位我

皇上祇譯

聖訓折衷至當

特諭增設東西晉元魏前後五代與遼金一體列祀又

命撤出漢之桓靈與明神熹二宗同黜祀典彰瘡之義  
為益昭矣至于前代陵寢所在歲時專祭或  
時巡躬祀或因事遣告禮典至為詳備又自

列聖以來防護修葺之

命史不絕書我

皇上隆禮前朝

特發百萬帑金修復前明諸陵殿宇俾臻完固仰見  
恩禮渥厚為非常之

曠典恭錄

諭旨詳著於篇

天聰三年十二月

太宗文皇帝征明至燕京遣貝勒阿巴泰薩哈廉往祭

金太祖世宗陵

順治元年五月以禮葬

明崇禎帝后又

詔明十二陵潔裡祀禁樵牧設司香官及陵戶給以香火

地畝仍

命戶部給歲時祭品二年正月

命祭

金太祖世宗陵於常用祭品外加太牢一著為例三月  
定每歲春秋仲月諏日遣官祭

歷代帝王廟增祀

遼太祖

金太祖世宗

元太祖

明太祖五帝增遼代功臣耶律赫魯原作耶律魯今改正曷金代

功臣尼瑪哈原作忽今改正沒斡里雅布原作斡里雅布今改正元代

功臣穆呼哩原作黎今改正木華巴延原作木華巴延今改正顏明代功臣

徐達劉基等從祀是月遣官祭

歷代帝王廟十月建

明崇禎帝享殿八年二月定直省所在

歷代帝王陵寢遇



大慶典遣官分詣河南淮寧縣祭

伏羲氏山西趙城縣祭

女媧氏湖南鄆縣祭

神農氏陝西中部縣祭

軒轅氏山東曲阜縣祭

少昊氏河南滑縣祭

高陽氏

高辛氏山東東平州祭

陶唐氏湖南寧遠縣祭

有虞氏浙江會稽縣祭

夏禹王山西滎河縣祭

商湯王河南內黃縣祭

商中宗西華縣祭

商高宗陝西咸陽縣祭

周文王武王成王康王涇陽縣祭

漢高祖咸寧縣祭

漢文帝長安縣祭

漢宣帝孟津縣祭

漢光武帝富平縣祭

後魏孝文帝三原縣祭

唐高祖醴泉縣祭

唐太宗蒲城縣祭

唐憲宗涇陽縣祭

唐宣宗河南鄭州祭

後周世宗鞏縣祭

宋太祖太宗真宗仁宗遼東廣寧衛

今為廣寧縣祭

遼太祖順天房山縣祭

金太祖世宗宛平縣祭

元太祖世祖江南江寧縣祭

明太祖順天昌平州祭

明宣宗孝宗世宗凡祭皆就享殿行禮或因陵寢設壇

惟元陵望祭六月

諭禮部順治元年定守明諸帝陵寢并祭典因神宗與我朝有嫌故裁之朕思前朝帝王陵寢理宜防護况我朝凡事俱從寬厚神宗陵寢著照十二陵例以時致祭仍設太監陵戶看守十三年十二月

諭禮部古來聖帝明王皆有大功德於民者所以累代相因崇祀不替今歷代帝王祭典雖已修舉但十三年來俱係遣官致祭朕今欲于明春親詣行禮以抒景仰前徽至意爾部即酌議禮儀具奏十四年正月定

親祭

歷代帝王廟儀又

諭禮部金代帝陵在房山縣迨明季國衰因我朝先取遼東誤疑金代陵旺氣相關遂將地脉掘斷又因己巳我太宗皇帝統師入關念金代先德遣王貝勒大臣往陵致祭乃復將石柱等拆毀建闕帝廟鎮壓朕思

天祚本朝於金何與故明不思運數有歸輒毀及金代陵寢愚誕甚矣金太祖世宗入帝王廟祀其陵寢照舊守

護地方官春秋致祭外爾部即遣官往房山視金陵周圍如切近處果有毀壞即酌量修整其闕帝廟仍留存

二月

世祖章皇帝親祭

歷代帝王廟六月立碑於

金太祖世宗陵

世祖章皇帝御製碑文勒石十六年三月

命立

明崇禎帝陵碑十一月

親酌

明崇禎帝陵遣官祭

明成祖仁宗宣宗英宗憲宗孝宗武宗世宗穆宗光宗

熹宗陵並

命修葺守護永禁樵採十七年正月

諭禮部前明崇禎帝廟精圖治十有七年不幸寇亂國亡

身殉社稷考其生平無甚失德邁茲厄運殊堪矜憫宜



加諡號以昭實行今諡為莊烈愍皇帝爾部即遵諭行  
尋遣官致祭於陵寢十一月遣官祭

金太祖世宗陵

康熙元年九月

聖祖仁皇帝諭歷代帝王陵寢原有祀典理宜虔肅舉行  
以昭追崇之意聞明朝陵向所給守護內員人戶地畝  
數少致各陵祭品備辦不敷止於大紅門外總祭殊於  
朕懷未愜嗣後萬歷陵不祭外每年應春秋二次太常

寺差官致祭金朝陵亦每年春秋太常寺遣官致祭其  
元朝陵未知定所應行望祭禮至前代各陵近者亦應  
春秋差官致祭遠者著各該地方官春秋致祭六年七  
月

聖祖仁皇帝親政遣官祭

歷代帝王陵十一年正月遣官祭明諸陵十四年八月

巡幸湯泉道經昌平

親至

明成祖陵酌酒分遣內大臣等致奠諸陵並

勅加謹防護十五年十月

駕幸昌平過明諸陵並

躬親酌酒越日遣官讀文致祭二十一年二月以滇南蕩

平遣官祭

歷代帝王陵二十三年十一月

南巡至蘇州

諭曰明太祖一代開創令主功德並隆朕巡幸方域將及

江寧鍾山之麓陵寢斯在朕優禮前代况於其君實賢  
可遣祀如禮又

諭明太祖陵已遣官致祭但朕既抵江寧欲至其處親為  
拜奠至日

躬詣行禮復

諭地方官不時巡察務俾守陵人役用心防護二十七年

十月

孝莊文皇后升祔禮成遣官祭

歷代帝王陵二十八年二月

南巡有

旨親祭

禹陵祭文內可書

御名至日

親撰祭文

躬詣致祭行三跪九拜禮又頒發

御書地平天成匾額懸於饗殿並

諭地方官即加修理增添守祀人役

駕至江寧

親祭

明太祖陵三十六年七月以平定噶爾丹遣官祭

歷代帝王陵三十八年四月

南巡至江寧

親往

明太祖陵奠酒畢

諭大學士等曰朕今日往明太祖陵寢致奠見其圮毀已甚皆由專司無人朕意欲訪察明代後裔授以職銜俾其世守祀事古者夏殷之後周封之於杞宋即今本朝四十八旗蒙古亦皆元之子孫朕仍沛恩施依然撫育明之後世應酌授一官俾司陵寢俟回京日爾部與九卿會議具奏是日并頒發

御書治隆唐宋匾額懸於陵殿四十一年十一月諭工部令杭州織造會同地方官修葺

禹陵四十二年二月

南巡至江寧遣官祭

明太祖陵又

命皇子往奠酒三月

聖祖仁皇帝五十萬壽遣官祭

歷代帝王陵十一月

西巡遣官祭

女媧氏陵



周文王武王成王康王陵又

漢高祖文帝宣帝光武帝陵又

諭文王武王皆古之聖君非他帝王可比且向以孔子聖人已書朕名致祭矣此祭文內亦須書名五十二年三月

聖祖仁皇帝六十萬壽五十七年十二月

孝惠章皇后升祔禮成均遣官祭

歷代帝王陵六十一年四月

諭大學士等曰朕披覽史冊於前代帝王每加留意書生輩但知識評往事前代帝王雖無過失亦必刻意指摘論列長短全無公是公非朕觀歷代帝王廟崇祀者每朝不過一二位或廟享其子而不及其父或配享其臣而不及其君皆因書生妄論而定甚未允當况前代帝王曾為天下主後世之人俱分屬臣子而可輕肆議論定其崇祀與不崇祀乎今宋明諸儒尚以其宜附孔廟奏請前代帝王既無後裔後之君天下者繼其統緒即

當崇其祀典朕君臨宇內不得不為前人言也朕意以  
為凡曾在位除無道被弑亡國之主外應盡入廟崇祀  
爾等公同從容詳議具奏大學士等遵

旨會議疏上

諭明愍帝無甚過失國亡乃伊祖所致愍帝不可與亡國  
者例論神宗光宗哲宗三君不應入祀其歷代功臣有  
治安之世輔佐有功者量加增補十一月

世宗憲皇帝登極遣官祭

歷代帝王陵是月大學士等議覆

歷代帝王廟增祀

夏王啓仲康少康杼槐芒泄不降扃厘孔甲臯發

商王太甲沃丁太庚小甲雍已太戊仲丁外壬河亶甲

祖乙祖辛沃甲祖丁南庚陽甲盤庚小辛小乙武

丁祖庚祖甲廩辛庚丁太丁帝乙

周成王康王昭王穆王共王懿王孝王夷王宣王平王

桓王莊王僖王惠王襄王頃王匡王定王簡王靈

王景王悼王敬王元王貞定王考王威烈王安王  
烈王顯王慎靚王

漢惠帝文帝景帝武帝昭帝宣帝元帝成帝哀帝明帝  
章帝和帝殤帝安帝順帝冲帝桓帝靈帝昭烈帝  
唐高祖高宗睿宗元宗肅宗代宗德宗順宗穆宗文宗  
武宗宣宗懿宗僖宗

遼太宗景宗聖宗興宗道宗

宋太宗真宗仁宗英宗神宗哲宗高宗孝宗光宗寧宗

理宗度宗端宗

金太宗章宗宣宗

元太宗定宗憲宗成宗武宗仁宗泰定帝文宗寧宗

明成祖仁宗宣宗英宗景宗憲宗孝宗武宗世宗穆宗

愍帝凡一百四十三位其從祀功臣增黃帝臣蒼

頡商臣仲虺周臣畢公高呂侯仲山甫尹吉甫漢

臣劉章魏相丙吉耿弇馬援趙雲唐臣狄仁傑宋

璟姚崇李泌陸贄裴度宋臣呂蒙正李沆寇準王

曾范仲淹富弼韓琦文彥博司馬光李綱趙鼎文

天祥金臣呼嚕

原作斛羅  
今改正

元臣博果密

原作不忽  
未今改正

托克托

原作脫  
今改正

明臣常遇春李文忠楊士奇楊

榮于謙李賢劉大夏凡四十人奉

世宗憲皇帝諭是依議速行十二月增設牌位致祭遣履

郡王允禔行禮

世宗憲皇帝御製

歷代帝王廟碑文摹勒上石

雍正元年二月恭上

聖祖仁皇帝尊謚禮成遣官祭

歷代帝王陵九月

世宗憲皇帝諭朕近於

聖祖仁皇帝所遺書笥中檢得未經頒發

諭旨以明太祖崛起布衣統一方夏經文緯武為漢唐宋  
諸君之所未及其後嗣亦未有如前代荒淫暴虐亡國  
之跡欲大廓成例訪其支派一人量授官爵以奉春秋



陳薦仍世襲之伏讀之下仰見我

聖祖仁皇帝海涵天覆大度深仁遠邁百王超軼萬古朕  
思史紀東樓詩歌白馬商周以來無不推恩前代後世  
類多疑忌以致歷代之君宗祀殄絕朕仰體

聖祖如天之心遠法隆古盛德之事謹將

聖祖所貽

諭旨頒發訪求明太祖支派子姓一人量授爵秩俾之承  
襲以奉春秋祭享但恐有明迄今年代久遠或有姦徒

假冒致生事端大學士即會同廷臣詳明妥議以副

聖祖仁皇帝寬仁矜恤之至意是日發出恭錄

聖祖仁皇帝諭旨曰朕於宮中詳覽前史每見開國之君必英姿偉畧才識過人始能創肇丕基奄有天下其謀謀經畫間雖詳畧不同未有不期其子孫善克負荷以傳永久迨其嗣君習於晏安隳墮先業或縱恣嗜慾或委任非人遂致綱紀廢弛滅絕宗祀良可悼歎明太祖天授智勇崛起布衣緯武經文統一方夏凡其制度準

今酌古咸極周詳非獨後代莫能越其範圍即漢唐宋諸君誠有所未及也乃至末葉衰頽災荒疊見臣工則門戶紛然盜賊則西北蠡起京師失守社稷顛覆考其嗣主實未有如前代荒淫暴虐亡國之跡蓋亦歷數使然耶我朝殲逐逆寇入關定鼎明代諸陵特設人員守護使不湮於荒烟蔓草者亦已逾於舊典矣朕三經南巡皆詣明太祖陵園親行奠酌更令嚴禁樵牧歲加葺治緬惟明太祖曠世英雄超軼往昔規模典章我朝尚多徵據豈可使其宗

卷四十九  
祀淪絕承守無人今宜大廓成例訪其支派一人量授  
爵秩以奉春秋陳薦仍世襲之庶可慰明太祖英靈於  
九原亦以昭朕仁厚矜恤之懷使天下後世咸共曉焉  
爾內閣大學士即會同吏禮二部確議以聞十一月

聖祖仁皇帝升配

南北郊十二月

冊立

皇后禮成均遣官祭

歷代帝王陵二年二月禮部等奏明代後裔有鑲白旗  
現任直隸正定府知府朱之璉一支乃明太祖第  
十三子代簡王之後譜牒明確請於此一支按譜

揀選引

見揀用一人從之三月

世宗憲皇帝親祭

歷代帝王廟七月

諭禮部嗣後親祭

歷代帝王廟日鹵簿大駕俱由廟門映壁外行十月吏部帶領明代後裔朱之璉等六人引

見得

昔朱之璉著為一等侯世襲其族准入正白旗是年授爵之後遣往江寧祭明太祖陵一次祭畢回京往昌平州祭明十二陵一次嗣後春秋二季於該旗都統處呈明前往昌平致祭遇有應往江寧祭明太祖陵之處禮部請

旨令其前往三年九月四年二月五年三月七年十二月

均

親祭

歷代帝王廟十三年九月

皇上御極遣官祭

歷代帝王陵十一月恭上

世宗憲皇帝尊謚禮成遣官祭

歷代帝王陵

乾隆元年二月

命各省修理

歷代帝王陵並添設陵戶六月

皇上諭易名以謚古之制也自周公定為謚法後世帝王未有無謚者明建文為太祖之嫡孫纘承大統在位四年固儼然天下共主矣及成祖既有其天下并去其年號而史官所書則仍稱為建文元年二年三年四年此國之所賴有信史也然不係之以謚而稱



曰建文皇帝此俗稱非史體也傳之後世殊為闕典考之太祖有元之天下而謚元主為順帝我

世祖章皇帝代明之天下而謚明主為愍皇帝雖更姓改物之君尚且追謚而無所嫌忌況當其世者乎弘治以來如楊循吉諸人屢以為請迄寢不行皆以後世子孫席有成祖之業故不敢變亂舊章而不慮其貽譏來世也我國家謚崇禎而不謚建文者以明史未竣非當時所急今史書既成若不及此追謚良為遺

憾大學士九卿會議確擬具奏候朕親加裁定尋議

上得

旨用恭閔惠皇帝謚九月

詔以

明恭閔惠皇帝入祀

歷代帝王廟是年禮部議准

帝堯陵在濮州城東南六十里古雷澤之東地為穀林

應即舊址加修照例設守陵陵戶春秋祭享嗣後

遇遣官祭告大典即往穀林行禮至東平一陵或  
係昔時衣冠弓劍之所藏仍飭有司以時展祀二  
年五月

世宗憲皇帝升配

南郊十二月

冊立

皇后禮成均遣官祭

歷代帝王陵三年九月

皇上親祭

歷代帝王廟八年九月

皇上詣

盛京於廣寧遣官祭

遼太祖陵九年二月

親祭

歷代帝王廟十年九月

諭從前

聖祖巡幸路經昌平曾遣官致祭明陵此次進口路過昌

平應如何遣官致祭該部查例具奏尋禮部覆奏得  
旨遣官分詣諸陵致祭十月侍郎錢陳羣奏言

明莊烈愍皇帝陵享殿傾圮風雨剝落請重為修葺奉  
旨著照所請行十一年閏三月

命陝西修

歷代帝王陵十三年二月

東巡至曲阜

親祭

少皞陵十四年以平定金川恭加上

皇太后徽號遣官祭

歷代帝王陵十五年八月

聖駕巡幸中州遣官祭

周文王廟

漢光武帝陵

周世宗陵十六年三月

聖駕南巡至浙江

親詣

禹陵致祭奉

諭朕時巡至杭州

禹陵在望緬維平成之德萬世永賴

皇祖聖祖仁皇帝曾親祀焉爰東渡浙江陟會稽式遵  
皇祖舊典躬薦馨于宇下厥有妣氏子姓世居陵側應世

予八品官奉祀該督撫擇其有品行者一人充之用

昭崇德報功至意

駕至江寧

親祭

明太祖陵八月

諭金朝陵寢近在房山歲久榛蕪未經修葺朕惟

金太祖

金世宗功德載在史書景仰傳之奕禩我

世祖章皇帝



聖祖仁皇帝勒石建亭以垂不朽顧念國家祀典光昭雖以時遣官將事而一切享殿繚垣儀制所存觀瞻宜備其令直隸總督方觀承前往相度有應增修除治者即行奏聞率屬鳩工庀事工竣之後朕將躬親展奠以昭敬禮前朝之意十一月

皇太后六旬萬壽遣官致祭

歷代帝王陵十八年二月

親祭

金太祖世宗陵十九年七月

皇上重詣

盛京於廣寧遣官祭

遼太祖陵二十年六月平定準噶爾大功告成遣官祭

歷代帝王陵二十一年三月

東巡至曲阜

躬詣

少皞陵上香二十二年二月

南巡於浙江遣官祭

禹陵於江寧遣官祭

明太祖陵越一日

親詣

明太祖陵奠酒自後

南巡江浙並致祭如禮二十四年十一月平定回部大

功告成遣官祭

歷代帝王陵二十六年十一月

皇太后七旬萬壽遣官祭

歷代帝王陵二十七年

命重修

歷代帝王廟並令改葺黃瓦以崇典禮二十九年二月

工竣

御製碑文勒石三月

親祭

歷代帝王廟三十六年十一月

皇太后八旬萬壽遣官祭

歷代帝王陵四十年禮部議准停止明世宗陵祭祀四

十年三月

親祭

歷代帝王陵四十一年五月以平定金川遣官祭

歷代帝王陵四十五年八月

皇上七旬萬壽

恩詔遣官祭

歷代帝王陵四十八年三月

親祭

歷代帝王廟四十九年二月

皇上南巡過曲阜

親詣

少皞陵行禮閏三月至江寧

親詣

明太祖陵行禮奉

諭禮部奏詣明太祖陵儀注三奠酒每奠行一叩禮等語前代陵寢於經過時親詣拈香自應較本朝

陵寢儀節有別然朕加隆前代禮數從優昨經過曲阜親詣少皞陵孔林皆行二跪六叩禮嗣後遇親詣前代陵寢俱照此行禮不必奠酒著為令七月

諭朕因覽四庫全書內大清通禮一書所列廟祀歷代帝王位號乃依舊會典所定有所弗愜於心敬憶

皇祖實錄有勅議增祀之諭令查取禮部原議紅本則係

康熙六十一年十一月內具題爾時諸臣不能仰體  
聖懷詳細討論未免因陋就簡我

皇祖諭旨以凡帝王曾在位者除無道被弑亡國之主此

外應盡入廟即一二年者亦應崇祀煌煌

聖訓至大至公上自羲軒下至勝國其間聖作明述之君

守文繼體之主無不馨香妥侑不特書生臆論無能

仰喻

高深即歷代以來升歆議禮未有正大光明若此者也乃



會議疏內聲明偏安亡弒不入祀典而仍入遼金二朝不入東西晉元魏前後五代未免意有偏向視若仰承

聖意而實顯與

聖諭相背朕意若謂南北朝偏安不入正統則遼金得國亦未奄有中原何以一登一黜適足啓後人之訾議即因東西晉前後五代有因篡得國擯而不列如操丕不得為正統之例殊不知三國時正統在昭烈故

雖以陳壽三國志之尊魏抑蜀而卒不能奪萬世之公評至司馬氏篡竊以還南朝神器數易如宋武帝崛起丹徒手移晉祚自不能掩其篡奪之罪其他雖祖宗得國不正而子孫能繼緒承休即為守文中主亦不可槩從缺畧况自漢昭烈以至唐高祖統一區夏時之相去三百餘年其間英毅之辟節儉之主史不絕書又安可置而不論至於後五代如朱溫以及郭威或起自寇竊或身為叛臣五十餘年更易數姓

中華統緒不絕如綫然周世宗承藉郭氏餘業憑有疆域尚不失為令主此而槩不列入則東西晉前後五代數百年間創守各主祀典缺如何以協千秋公論他若元魏雄據河北地廣勢強太武道武勤思政理講學興農亦可謂偏安英主並當量入祀典以示表章朕前命館臣錄存楊維禎正統辨論內詳晰宣論以維禎所辨正統在宋不在遼金元之說為是所以存春秋綱目之義見人心天命之攸歸且檢閱孫

承澤春明夢餘錄所載明代崇祀古帝王位號原未  
列遼金二朝今通禮內崇祀遼金而不入東西晉前  
後五代似此互相入主出奴伊於何底是皆議禮諸  
臣有懷偏見明使後世臆說之徒謂本朝於歷代帝  
王未免區分南北意存軒輊甚失

皇祖降諭之本意也至明之亡國由於神熹二宗紀綱廢  
而法度弛愍帝嗣統時國事已不可為雖十七年身  
歷勤苦不能補救傾危卒且身殉社稷未可與荒淫

失國者一例而論是以

皇祖審裁將神熹二宗撤出而愍帝則

特令廟祀

褒貶予奪毫釐不爽實千古大公定論乃諸臣於定議時  
轉復將漢之桓靈增入豈未思炎漢之亡亡於桓靈  
而不亡於獻帝乎從前定議未將東漢全局詳審論  
斷轉使昏闇之君濫叨廟食所議未為允協夫自古  
帝王統緒相傳易代以後饗祀廟庭原以報功崇德

至於嚴篡竊之防戒守成之主或予或奪要必衷於  
至當而無所容心於其間方協彰瘴之義所有歷代  
帝王廟祀典著大學士九卿更行悉心詳議具奏並  
著於定議後交四庫館恭錄

皇祖諭旨並朕此旨於通禮卷首以昭殿鑒歷朝垂示萬  
年之至意尋大學士等議奏酌擬增入廟祀

晉元帝明帝成帝康帝穆帝哀帝簡文帝

宋文帝孝武帝明帝

齊武帝

陳文帝宣帝

元魏道武帝明元帝太武帝文成帝獻文帝孝文帝宣

武帝孝明帝

唐明宗

周世宗共二十三帝又

唐憲宗

金哀宗二帝應否增入廟祀恭候

欽定得

旨據大學士九卿等會議增祀兩晉元魏前後五代各  
帝王一摺並聲請唐憲宗金哀宗應否一體增祀等  
語憲宗處唐中葉各鎮節度憑陵跋扈僭叛不臣憲  
宗命將專征削平淮西厥功頗偉在有唐一代中尚  
屬英主其末年被弑係禍變猝乘與荒亂失德召變  
致衅者不同至金哀宗處衰弱之時國勢已不可問  
推其致敗之由實由熙宗海陵淫虐厲哀宗自縊



殉國與明之愍帝事同一例自應一體增祀餘俱著  
照所議行五十年正月

皇上御極五十年大慶

恩詔遣官祭

歷代帝王陵二月

親詣

歷代帝王廟致祭行禮

御製祭

歷代帝王廟禮成恭記文曰予小子既敬遵

皇祖聖訓增祀

歷代帝王以今年二月春祭之吉奉

神主入廟禮以克成祭不欲數於是退而恭記曰

皇祖之聖允符我

皇考所尊稱大成有類

先師孔子而無以復加也即此增入之

旨實出大公至明乃稱歷代之名義而非有意於其間也

夫歷代者自開闢以來君王者之通稱非如配享

先師孔子有所旌別彰瘁於其間也夫有所旌別彰瘁於其間則必有所進退而是非好惡紛然起矣入者主之出者奴之將無所底止且以旌別彰瘁言之湯武即有慚德則歷代開創之君湯武且不若審如是三皇五帝之外其宜入廟者有幾是非祭

歷代帝王之義也故我

皇祖謂非無道亡國被弑之君皆宜入廟者義在此但引

而未發予小子敢不敬申其義乎蓋自洪武建廟南

京以來北京祖之所祀者寥寥

明洪武六年始建歷代帝王廟於南

京崇祀者三皇五帝夏禹王商湯王周文王武王漢高祖光武帝隋高祖唐高祖太宗宋太祖元世祖十

九帝已而罷周文王隋高祖唐高祖之祀嘉靖九年罷南京廟祀建歷代帝王廟於北京二十四年

又罷元世祖之祀及我

### 世祖定鼎燕京

幼齡即位百度畢舉爾時議禮之臣於議

歷代帝王廟位次亦頗有所出入

我世祖定鼎燕京因明代祀典順治

二年增祀遼太祖金太祖金世宗元太祖明太祖凡五帝而我

### 皇祖之諭亦因近

大事之際在康熙六十一年十一月諸臣未能仰導

聖意其出入亦頗不倫

會典載康熙六十一年諭旨凡帝王在位除無道被弑七

國之主外盡宜入廟崇祀爾時廷臣不能仰體

聖意詳細討論且疏奏在十一月

大事前數日

所議增祀夏商以來帝王一百四十三位并漢之桓靈皆入之寔不倫矣子小子於昨歲

閱大清通禮始悉其事因命大學士九卿更議增祀

而以仲春躬祀入所增

神主於廟

昨歲因閱大清通禮見崇祀歷代帝王位次有不愜于懷者如漢之闌入桓靈而於

前後五代全未議及因飭大學士九卿等更議增祀晉元帝以來二十五帝而於桓靈則撤出之以昭公

論今歲仲春入禮致祭詳見禮成述神主於廟躬予嘗論之洪武之

去遼金而祀元世祖猶有一統帝繫之公至嘉靖之  
去元世祖則是狃于中外之見而置一統帝繫於不  
問矣若

順治初之入遼金而去前五代則爾時議禮諸臣亦未免

有左袒之意孰若我

皇祖之大公至明昭示千古為一定不易之善舉哉夫天

下者天下人之天下也非南北中外所得私舜東夷

文王西夷豈可以東西別之乎正統必有所繫故予

於通鑑輯覽之書大書特書一遵春秋不敢有所軒

輒於其間予于歷代通鑑輯覽一書自隆古以至本朝四千五百餘年於南北朝及宋元遼金

正統偏安天命人心繫屬存亡之際大書特書必公必平如南宋自德祐以前尚有疆域可憑至臨

安既破帝見俘宋統始絕故自丙子三月以前為宋帝焜德祐二年三月以後為元世祖至元十三年

至于元順帝北遷沙漠委棄中原則自至正二十八年八月以後正統乃歸之明為洪武元年至我朝

世祖定鼎京師在甲申五月惟時明福王尚監國南京故通鑑輯覽仍書明以別之直至乙酉五月大清兵下江南福王就執始書明亡折衷義例惟嚴以惟謹一遵春秋之法無所容心曲徇於其間也

為一時之論雖權萬古之論不可欺也然則

歷代帝王之祀果即非如配享

先師孔子漢無旌別彰瘁於其間乎曰不然也

歷代帝王胥祀於景德之殿其有德無德若南若北曰  
中曰外是一家非一家章章如昭昭如孰可以為法  
孰可以為戒萬世之後入



廟而祀者孰不憬然而思惕然而懼耶是即不明示旌別彰瘕而已寓旌別彰瘕於無窮矣其有不憬然思惕然懼者則是無道之倫必不能入此

廟矣嗚呼可不懼哉可不懼哉雖然予更有後言焉蓋宜入

廟與不宜入誠昭然應知懼而我大清國子子孫孫祈天永命所以綿萬禩無疆之庥者更當以不入斯

廟為棘安不忘危治不忘亂用慎苞桑之固思及此有

不忍言而又有不忍不言者百世子孫其尚凜難謀  
之戒乎三月

駕幸湯山道經昌平

親酌

明成祖陵奉

諭直隸昌平州為前明陵寢之地本朝定鼎後我

世祖章皇帝即命以帝禮改葬思陵並勅工部修葺諸陵  
親臨奠酌併禁止樵採添設陵戶我

皇祖聖祖仁皇帝亦曾

親臨致奠並飭地方官加意防護所以加禮前代者最為  
優渥朕此次行幸湯山取道昌平躬詣長陵致奠見  
諸陵寢明樓享殿多有損壞神牌龕案亦遺失無存  
為之慨然弗忍視蓋由明代中葉以後國事廢弛全  
不以祖宗為念於陵寢並未修葺至末年復經流寇  
擾亂亦無入守衛以致日就傾圮若其後代之君果  
能歲加繕治整齊完固逮今不過百有餘年亦何致

顏剝若此又諸陵前雖建有碑座均未鐫泐未甯彼時是何意見今親臨奠醑周覽之下深為軫惻自應重加修葺增設龕位俾臻完備再我朝開闢之初睿親王以我師克取遼東時明之君臣惑於形家謬說疑金代陵寢與本朝王氣相關將房山縣金陵折毀是以爾時亦將定陵享殿撤出停其祭祀然明樓寶城仍存其舊未壞也維時我

世祖尚未親政其事實由睿親王建議亦非

世祖意也今國家一統已歷百數十年勝朝陵寢自應一體修復所有定陵享殿著仍行修建春秋祀事如故又明世宗永陵前因尹嘉銓條奏將其祭祀裁撤但前明之亡不亡於崇禎而亡於萬曆天啟是以歷代帝王廟中撤其位祀而陵寢仍前致祭明世宗雖溺意齋醮尚不致如萬曆天啟之昏庸失德其陵寢自應照前一體致祭以昭大公我國家受

天眷命

世德顯承於前代陵寢繕完保護禮從其厚此次修復諸  
明陵殿宇等工即費至百萬帑金亦所不靳所有此  
項工程著派尚書劉墉德保金簡侍郎曹文埴德成  
董率經理務期完固工成後飭該地方官隨時稽察  
小心防護嚴禁樵蘓用副朕隆禮勝朝之至意

臣等謹按杜典祀先代帝王之後有老君祠一條  
彼以一時所尚用加纂輯本非典要又孔子祠後  
有太公廟一條亦非定禮前明罷之甚當伏考

本朝祀典並無與此相類者應刪其目至杜典以巡狩  
入吉禮亦於義理未協茲謹從

大清通禮之例凡

巡幸盛典恭載於嘉禮門內若封禪之說不見經傳附  
會無稽莫甚於此杜典載之陋矣良由秦漢以至  
有唐多襲行之甚且以古帝王巡狩望祀之禮妄  
加緣飾誇耀當世愚惑後人宋代真宗踵行陋轍  
今

欽定續通典載之蓋存其事正所以黜其非也欽惟  
本朝受命

聖德

神功超越前代禮

天祭

地致敬

郊壇大典煌煌義昭崇報

聖祖仁皇帝省方登岱



慶行

惠施斥封祀之文而弗舉我

皇上法

祖時巡瞻禮秦岱

茂典重光望秩懷柔與詩書比烈矣伏讀辛卯春

東巡

御製登泰山即事言志詩有那舉升中禮之句

注云多有引升中語為幸泰山數典者不知升中乃燔

柴告

天即為封禪之說所自昉向嘗斥為不經是以前者兩陟  
岱頂及此次登嶽祝

釐不過辦香展敬並無所謂升中之事其誤不可不大  
哉

聖言折衷經訓而益精之允為卓越萬古恭識於此益  
以見杜典封禪之議可不待加闢而自明矣

皇朝通典卷四十九

欽定四庫全書

皇朝通典卷五十

禮 吉十

告禮

臣等謹按杜典所載歷代告禮惟就當時有所議定者採錄數條其餘皆不復著蓋以散見各門無庸複述也伏考

國朝定制有大典必先期祭告於

園丘

方澤

太廟

奉先殿

社稷及

陵寢或

親詣或遣官隨時協宜聿昭誠敬又因事祭告則

嶽鎮海瀆

歷代帝王陵寢

先師闕里亦皆載在彝章並以各具本門茲不備述謹

稽

列聖以來告禮有

特舉而非常行者恭紀於篇

天命元年正月

太祖高皇帝受

覆育列國英明皇帝

尊號行焚香告

天禮

天聰十年四月

太宗文皇帝受

寬溫仁聖皇帝

尊號建國號曰大清改元崇德先期祭告

天

地崇德元年十一月以征明大捷祭告

太廟自是大兵頻捷並告

太廟八年正月

太宗文皇帝聖躬違和遣官祭告

太廟

順治元年七月以中原平定遷都燕京遣官祭告

盛京

園丘

太廟並祭告

福陵

太宗文皇帝寢殿十月

世祖章皇帝以定鼎燕京祭告

園丘

方澤

太廟

社稷十二年正月以營建

乾清宮



景仁宮

承乾宮

永壽宮遣官祭告

園丘

方澤

太廟

社稷十一月冬至

郊祀禮成奉

諭朕自即位凡

郊祀大典必誠必敬間有遣代亦必如禮致齋今冬至祀  
天遣額爾克戴青恭代但因駐蹕南苑致齋日期爾部未  
經題明內院諸臣亦未奏知偶失記憶忽然猛省不勝  
悚惕朕為

天之子昭事當虔既有疎忽何敢自隱即選擇吉日祇申  
祭告於是以後四日巳酉遣官申告十四年十二月

諭禮部

皇太后聖體違和荷蒙

天

地

祖宗

社稷眷佑今已康寧朕心欣慶應躬行告謝禮爾部擇吉以聞尋禮部議奏以十五年正月戊午謝

圜丘已未謝

方澤辛酉謝

太廟

社稷十七年正月

諭禮部朕荷

天眷佑纘承

祖宗鴻緒統御天下夙夜乾惕圖所以久安海內永底昇  
平十有七年於茲乃民生尚未盡遂貪吏尚未盡改積  
習相承未臻丕變且滇黔雖入版圖而伏莽未靖征調  
猶繁焦思竭力治效未孚負

上天之簡畀愧

祖宗之寄托虛

皇太后教育之恩孤四海萬民之望非朕未嘗勵精求治  
實由涼德所致反覆循省罔敢即安茲欲引咎自責祭  
告

天

地

太廟

社稷布告中外爾部即擇期具奏尋禮部議奏奉

諭宜間日行禮於是以丙子告

圜丘丁丑告

方澤己卯告

太廟

社稷十八年正月

聖祖仁皇帝登極遣官祭告

圜丘

方澤

太廟

社稷

康熙元年三月以明桂王朱由榔就擒

親告

世祖章皇帝寢殿遣官祭告

園丘

方澤

太廟

社稷

福陵

昭陵六十年二月以

御極六十年大慶遣官祭告

圜丘

方澤

太廟



奉先殿

社稷六十一年十一月

世宗憲皇帝登極遣官祭告

園丘

方澤

太廟

奉先殿

社稷

雍正十三年九月

皇上御極遣官祭告

圜丘

方澤

太廟

奉先殿

社稷

乾隆三年正月以興工修

太廟

親詣祭告遣官祭告

園丘

方澤

奉先殿

社稷工竣祭告同十三年十一月冬至遣官祭告

奉先殿

皇上命於祭文中增叙入大學士傅恒經畧金川啟行

之期以謹告十六年正月以興修

皇乾殿

祈年殿遣官祭告

園丘

方澤

太廟後殿

奉先殿

社稷閏五月以興修

方澤

皇祇室祭告禮同十七年十二月以興修

園丘

皇穹宇祭告禮同工竣祭告咸如初禮

臣等謹按杜典有歷代所尚一條今考五德之運說本無稽蓋自漢儒始以為言後且流於讖緯杜典侈陳之惑已甚矣宋初尚沿其陋至元明而服御專尚黃色不取五行生尅之說制度始合正則

國朝因之以定一尊之義而闢萬古之疑杜典歷代  
所尚一條無庸增輯也至於司寒之祀

國朝並未舉行惟祭

太歲及四時月將之神禮意相近已見

太歲門茲不重述

祭

乾隆七年御史徐以升請立雩壇行雩祭并請祈  
求晴霽亦於雩壇致禱下禮部議以久雨祈晴前

代皆無崇祭雩壇之禮請仿古制崇祭國門仍不止則伐鼓用牲於社今直省遵制行之尋以神位字樣為請禮部議令間行崇祭則書城門之神字樣得

旨允行

祈禱

臣等謹按杜典有祈禳一條今從其例立祈禱門敬考

策府所載備紀於篇仰見

列聖以來精禋致禱皆本誠敬之實意自與杜典所載有  
迥異者至於祈禱早潦已見

雩祀諸篇茲不具述云

崇德八年四月

太宗文皇帝聖躬違和

命禱於盛京各廟

順治十三年三月



世祖章皇帝諭禮部曰朕自親政以來夙夜冰兢罔敢怠忽務求克當

天心光昭

祖德民安物阜早底治平乃近者冬雷春雪隕石雨土所在見告變非虛生皆朕不德所致用是恐懼靡寧撫躬自責披瀝悃誠冀回災變欲昭告於

上帝

祖宗實圖省改爾部擇吉具奏四月乙卯祭告

南郊

太廟

康熙十八年九月乙巳

聖祖仁皇帝諭禮部曰前以地震示警朕恐懼修省夙夜靡寧已經遣官虔告

郊壇乃精誠未達迄今時復震動未已朕心益用悚惕茲當虔誠齋戒躬詣

天壇親行祈禱爾部擇期具儀來奏越五日庚戌

親詣

天壇行祈禱禮二十六年十二月以

太皇太后聖體違和步禱

南郊祝文曰臣仰承

天佑奉事

祖母太皇太后高年荷庇藉得安康今者疹患驟作一旬

以內漸覺沉篤旦夕可慮臣夙夜靡寧寢食捐廢虔治

藥餌徧問醫方罔克奏效五內憂灼莫知所措竊思

天心仁愛覆燾無方矧臣眇躬夙蒙

慈養憶自弱齡早失怙恃趨承

祖母膝下三十餘年鞠育教誨以至有成設無

祖母太皇太后斷不能致有今日成立罔極之恩畢生難

報值茲危殆方寸憤迷用敢潔蠲擇日謹率羣臣呼籲

皇穹伏懇憫念篤誠立垂昭鑒俾沉疴迅起遐算長延若

大數或窮願減臣年冀增

太皇太后數年之壽為此匍伏

壇下仰祈

洪祐不勝懇禱之至行禮讀祝伏地誠懇涕泗交頤諸王

大臣等莫不感泣

雍正十年三月京師旱多風

世宗命祈於

風神廟

乾隆九年五月

皇上諭京師自春徂夏雨澤愆期風霾時作朕心憂惕

親製祭文遣平郡王福彭虔禱於

風神廟

羣祀

臣等謹按杜典載高禩祓禊兩門今無其事應從  
刪去至於雜祠淫祠析為二條亦多不經之祭伏  
考

國朝祀典所載凡皆有功於國有德於民春秋享報  
於禮為宜其間或從舊

加封或因事

特命揆禮度義具有本末謹依會典通禮所載考其由  
來詳厥典禮彙為羣祀篇云

順治元年定祀

先醫之神之禮每歲春二月冬十一月上甲日致祭  
先醫於太醫院署之

景惠殿殿中安奉

太昊伏羲氏神位於正中

炎帝神農氏神位於左

黃帝軒轅氏神位於右東配勾芒風后西配祝融力牧  
東廡僦貸季天師岐伯伯高少師太乙雷公伊尹

倉公淳于意華陀皇甫謐巢元方藥王韋慈藏錢

乙劉完素李杲西廡鬼臾區俞跗少俞桐君馬師

皇神應王扁鵲張機王叔和抱朴子葛洪真人孫

思邈啓元子王冰朱肱張元素朱彥修均東西向

以禮部堂官一員主祭太醫院堂官二員分獻



雍正十二年令太醫院御醫吏目等官咸齋戒陪祀

順治元年定祀

關帝之禮建廟於

地安門外歲以五月十三日遣官致祭九年

敕封忠義神武大帝

雍正三年

敕封關帝

曾祖為光昭公

祖為裕昌公

父為成忠公製造神牌安奉後殿於五月致祭外增  
春秋二祭又以後裔之在洛陽者授為五經博士  
世襲罔替四年以

關帝原籍山西解州後裔照洛陽世襲之例授為五  
經博士七年定直省

關帝廟歲三祭皆用太牢十年令於湖北當陽縣增

置五經博士以奉塚墓之祀

乾隆二十五年易

關帝原謚為神勇三十三年三月

敕加忠義神武靈佑關聖大帝封號四十一年七月

諭關帝在當時力扶炎漢志節凜然乃史書所謚並非  
嘉名陳壽於蜀漢有嫌所撰三國志多存私見遂不  
為之論定豈得謂公從前

世祖章皇帝曾降

諭旨封為忠義神武大帝以褒揚盛烈朕復於乾隆三十三年降旨加靈佑二字用示尊崇夫以神之義烈忠誠海內咸知敬祀而正史猶存舊謚隱寓譏評非所以傳信萬世也今當抄錄四庫全書不可相沿陋習所有志內闕帝之謚應改為忠義第本傳相沿已久民間所行必廣難於更易著交武英殿將此旨刊載傳末用垂久遠其官版及內府陳設書籍並著改刊此旨一體增入

順治二年八月定祀

都城隍之神之禮以八月二十七日遣太常寺堂官  
致祭行禮自後歲以為常廟在都城宣武門內八  
年定

萬壽聖節遣官致祭之禮

雍正四年建

禁城城隍神之廟九年建

皇城城隍神之廟一在禁城西北隅一在西安門內

曰永佑宮歲以

萬壽聖節及季秋遣內務府總管各一人致祭如祭

都城隍廟之禮

順治八年定祀

北極佑聖真君之神廟在地安門外日中坊橋東曰

靈明顯佑宮每年

萬壽聖節遣官致祭

順治八年定祭

東嶽之神之禮廟建於朝陽門外每年  
萬壽聖節遣官致祭

康熙二年定祀

火神之禮廟在地安門外日中坊橋西歲以六月二  
十三日遣官致祭

雍正八年定祭禮加少牢為太牢

乾隆十八年定祀

火神廟改用紅色禮神制帛二十三年二十四年

皇上親詣廟拈香

康熙二十年以

都城西北三十餘里金山之麓舊有黑龍潭禱雨輒  
應重建祠宇

聖祖仁皇帝御製碑文勒石

雍正二年

世宗憲皇帝親詣致禱澍雨立應重修工竣

御製碑文



親灑宸翰勒石廟庭

乾隆五年三月

皇上親詣祈雨五月

諭黑龍潭龍神福國佑民靈顯素著每遇京師雨澤愆期祈禱必應是明神功德實能膏潤田疇順成年穀為萬姓之所仰賴昔年

皇祖式廓廟貌建立豐碑

皇考又復易以黃瓦用昭敬禮今應加封號以示尊崇著

大學士會同該部定議具奏尋大學士等議奏得  
旨封為

昭靈沛澤龍王之神每歲春秋致祭二十五年二月  
諭歲祭

黑龍潭龍神遣內務府

圓明園大臣行禮二十八年四月

親詣

黑龍潭祈雨得雨報謝如初禮自後偶遇微旱均

親詣祈雨甘澍立應

乾隆九年封

玉泉山龍神為惠濟慈佑龍神廟建於

靜明園內玉泉山十六年奉

諭旨京師玉泉靈源濬發為德水之樞紐畿甸衆流環  
匯皆從此滌注朕歷品名泉實為天下第一其澤流  
潤廣惠濟者博而遠矣上有龍神祠已命所司鳩工  
崇飾宜列之祀典其品式一視黑龍潭該部具議以

聞尋議奏謹案玉泉出西山東流環注京師抵通州  
合白潞以達於海靈源濬發流澤布惠利賴於畿  
輔實多允宜列之祀典俟廟工完竣照例遣官往  
祭并請

敕賜鴻文勒石祠左以昭神功從之二十五年二月  
諭歲祭

玉泉山龍神遣內務府

圓明園大臣行禮

康熙二十八年定祀

礮神之禮每歲九月初一日陳礮位於盧溝橋沙鍋村由太常寺奏請遣漢軍都統將事八旗按翼排列承祭都統於鑲黃旗礮位前行禮七旗都統各於本旗礮位前隨承祭官上香行禮副都統以下咸陪祀三十五年

聖祖仁皇帝親征噶爾丹遣官致祭

火礮之神讀祝行禮如儀三十六年凱旋遣祭如初

雍正三年定每三年一次遣官致祭

乾隆十四年定滿洲火器營祭八旗

子母礮神每年請

旨舉行以火器營總統一人承祭祭品禮儀均與漢軍祭礮儀同十八年定八旗漢軍都統致祭

礮神各遣一人承祭祝文內書

皇帝遣某官某等

書鑲黃旗都統名如有故則書次旗都統名由太常寺臨時開列具奏

三十年定致祭

礮神用祝版并製祭器八旗漢軍都統并滿洲火器  
營皆同

順治初定制遇大興作隨其營造所在各建采棚  
致祭

后土

司工之神又凡大工迎吻祭

琉璃窯神並經由一路

門神各遣官一人將事禮儀與祭

司工之神同

順治十六年織造局設機祭告

司機之神遣官行禮

雍正七年以

國家漕運之利遠軼前代儲積盈溢分建各倉以貯  
之倉中或舊有神祠未列祀典司事者以奏請下  
禮部議通州三倉惟大西倉舊有倉神祠在京城  
內七倉惟右翼興平倉舊有太倉神祠俱應重加



修葺左翼擇於海運倉城外五倉擇於新建之儲  
濟倉各建廟宇每歲春秋致祭

敕封通州倉為

均調顯佑司倉之神左翼倉為

豐儲裕餉司倉之神右翼倉為

佑農廣惠司倉之神新建二倉為

凝禧阜衆司倉之神各

賜御書匾額載入祀典

臣等謹按以上所列均為羣祀或由太常寺請

旨遣官致承或令所司以時專祭載在會典至如昭忠  
祠以下皆奉

特旨建祠

京師春秋致祀謹各條列於後

昭忠祠

雍正二年十月

諭朕惟周禮有司勳之官凡有功者書名太常祭於大雩

祭法曰以死勤事則祀之凡以崇德報功風勵忠節也  
我

太祖高皇帝肇造鴻圖

太宗文皇帝式廓區夏

世祖章皇帝奄有萬邦自創業以至定鼎將帥之臣致命  
立功者不少

聖祖仁皇帝臨御六十一年中間殲滅三逆永清朔漠以  
及平定西藏臺灣雖天戈所指如疾風振槁而師旅之

臣捐軀馬革及守土之官見危授命者所在多有邇者  
青海蕩平西域效順然自用兵以來將士奮勇前驅亦  
有沒於行陣者此皆盡忠報國之臣朕甚嘉之亦甚憫  
之當於京師建立祠廟春秋妥侑世世血食其偏裨士  
卒力戰敵愾舍生取義者亦附列左右用褒崇大節揚  
表芳徽俾遠近觀聽勃然生忠義之心於治道亦有裨  
益仍令翰林官纂其籍貫事蹟各為立傳彙成一編垂  
諸永久九卿詹事科道悉心詳議具奏尋議覆凡文武

諸臣臨陣捐軀守土授命及偏裨士卒赤心報國  
奮不顧身者令兵部查案行文八旗直省將籍貫  
事蹟繕冊具奏交工部於京城內度地立祠製牌  
位恭請

欽定匾額文武諸臣牌位設正祠偏裨士卒牌位設兩廡  
入祠日遣官祭每歲春秋二祭太常寺司其事仍  
令翰林院詳攷史冊立傳從之六年工竣祠立崇  
文門內

欽定曰昭忠

御賜表獎忠勲匾額七年諫吉將議定王公大臣官員兵

丁牌位入祠安設前室正中和碩敬謹莊親王尼  
堪英誠武勲王揚古利定南武壯王孔有德追贈  
忠勇王黃芳度武襄公巴爾堪五人東次龕贈太  
傅一等公安北將軍謚忠勇佟國綱等三十人西  
次龕續順公沈瑞等二十四人東又次龕前鋒統  
領騎都尉劉哈等十八人西又次龕福建提督段

應舉等十八人東末龕贈左都督太子少保總兵  
官謚忠愍吳萬福等十八人西末龕贈雲騎尉護  
軍叅領署護軍統領郭色等十七人後正室備禦  
尼馬禪等一百十五人左次龕贈雲騎尉護軍叅  
領倭赫等七十人右次龕一等輕車都尉李普哈  
達等八十人左又次龕叅將劉衍等四十五人右  
又次龕二等輕車都尉莽儀祿等四十人東配樓  
贈雲騎尉七品官覺羅星德等七十四人左次龕

贈雲騎尉護軍校德赫得等六十九人右次龕贈  
雲騎尉驍騎校花色等七十二人左又次龕贈雲  
騎尉護軍校艾塔等一百八人右又次龕贈雲騎  
尉五品官薩郭等一百十三人西配樓贈雲騎尉  
護軍校雅思哈等一百十九人左次龕護軍校胡  
紐等七十一人右次龕贈七品官護軍覺和托等  
九十四人左又次龕千總李龍等七十三人右又  
次龕典史贈主簿諸士英等一百一人東廡三等



輕車都尉赫爾德等五十六人左次龕騎都尉贈  
雲騎尉汪騰高等七十七人右次龕騎都尉吳魯  
禮等五十五人西廡守備劉澤久等五十六人左  
次龕雲騎尉贈騎都尉牛默淳等六十九人祔祀  
兵丁分別東西房共一萬三百有七人八年二月  
春祭遣官奉

旨嗣後著將各部滿尚書八旗都統開列請旨後祠兩廡  
著太常寺派官分獻十一年令入祠滿漢諸臣子孫在

京居官及有頂帶者均於祭日隨班行禮

乾隆元年

諭昭忠祠崇祀忠節諸臣原屬酬勲之曠典其子孫內  
或有寢至衰替不克振其家聲者情殊可憫著將崇  
祀昭忠祠各員之子孫除見在出仕者無庸具奏外  
其子孫內如並無出仕之人而貧乏不給才尚有可  
用者各該旗簡選引見候旨以示朕崇獎忠勲之至  
意十三年七月

諭經畧大學士等奏稱署總兵任舉統兵攻昔領石城  
親身督戰奮往直前多所斬獲乘勝追殺致被鎗傷  
陣亡等語考之典禮以死勤事者祀之本朝特建昭  
忠祠用享疆場効命之臣任舉著入祠從祀又禮部  
遵

旨議奏四川軍營三等侍衛丹泰奮勇攻擊殺死賊番  
三人夫盡力戰槍傷陣亡應入祀昭忠祠仍交翰  
林院立傳從之是年定八旗世爵官員有年久絕

金史卷五十一  
卷五十一  
嗣將原立官之人入昭忠祠設立牌位一體饗祀  
以昭勞績十四年正月

諭金川逆首窮蹙乞命朕已網開三面允准納降現在  
振旅班師但念自用兵以來已逾二載將弁兵丁有  
攻碉奪卡奮不顧身以致陣亡者深堪憫惻著四川  
總督等詳察報明經畧核定具奏交部從優議卹尋  
議覆陣亡傷亡官員兵丁等均入祀昭忠祠交翰  
林院立傳從之十五年以駐藏都統加贈一等伯

傅清左都御史加贈一等伯拉布敦入祀昭忠祠  
十八年定昭忠祠前殿正龕內武襄公巴爾堪西  
第一龕內輔國公巴賽皆追封簡親王應改題封  
號移巴爾堪位於英誠武勳王揚古利之上移巴  
賽位於定南武壯王孔有德之上前室左右各三  
龕祀公侯以下至二三品官向皆以爵秩尊卑為  
序不論時代先後遂至淆雜無倫應將入祠大臣  
官員自天命年以來按代序官同代同官則序年

月再前室內見設神牌內有贈襲公侯伯子男世爵而官兼尚書都統侍郎副都統者有任尚書都統等官而世爵不及五等者亦有贈襲世爵而別無兼銜者更有官爵本小以子孫貴顯追封加大者位次最難允協應照賢良祠按代序官之例公侯伯居首大學士內大臣次之尚書都統將軍總督一品子爵前鋒統領護軍統領侍郎巡撫副都統二品男爵三品京卿提督總兵官及武職加贈

至正從一品等官皆依次序列於前室四品卿翰林院學士藩臬一等侍衛叅領輕車都尉及武職二品之副將等官皆列後正室五品少卿二等待衛道府佐領騎都尉及武職三品之叅將遊擊等官皆列後左室講讀御史部員三等侍衛雲騎尉及武職四品之都司等官皆列後右室同知知州通判驍騎等校及武職五品之守備等官皆列前東配室知縣筆帖式州同縣丞以下及武職六七

品之千把總等官皆列前西配室以上均按時代  
官爵為序庶位次秩然而忠義之靈益昭妥侑至  
祠內兵丁設位計前後廡共八處應將各龕皆以  
橫板隔別次第安設春秋配食可垂永久又奏定  
昭忠祠改用報功制帛二十年平定準噶爾以出  
師陣亡傷亡官員兵丁等入祀昭忠祠文翰林院  
立傳二十一年以死事義烈公班第剛烈伯鄂容  
安入祀昭忠祠二十四年平定回部以出師陣亡



傷亡官員兵丁等入祀昭忠祠交翰林院立傳三  
十二年以將軍公明瑞都統扎拉豐阿護軍統領  
觀音保總兵李全王玉廷副都統伊柱入祀昭忠  
祠四十一年平定兩金川以出師陣亡傷亡官員  
兵丁等入祀昭忠祠交翰林院立傳凡昭忠祠祭  
儀具

大清通禮

賢良祠

雍正八年七月

諭國家効忠宣力之臣勲績懋著必膺崇報之典令其世享烝嘗雍正二年朕已敕建昭忠祠自開國以來致命立功盡忠報國之儔皆得春秋妥侑世世血食顧念古者大烝之祭凡法施於民以勞定國者皆得並列祀典永受明禋則我朝名臣良弼其經邦佐治黼黻昇平者皆祭法所必登朕欲為之建立祠宇久矣即如怡親王之精白一心忠誠體國勲在社稷澤被生民其功德隆

盛又豈一切効忠宣力者之所可比論乎洪惟

太祖

太宗創業垂統厥有一德佐命之良

世祖撫綏萬邦實多奮庸熙載之彥迨我

聖祖臨御六十餘年其間良臣碩輔後先相望據朕所深知者舉其一二如大學士公圖海公賴塔大學士張英尚書顧八代馬爾漢趙申喬河道總督靳輔齊蘇勒總督楊宗仁巡撫陳瓊等持躬正直奉職公忠或垂節鉞

之勲或勵冰霜之節俯仰無媿為朝野所共欽終始不渝無瑕疵之可指此等靖共爾位不愧古大臣之風者正不乏人既樹羽儀於一世宜隆俎豆於千秋且使世世為臣者觀感奮發知所慕效羣以臯夔稷契共相期待則明良喜起之盛朕於斯有厚望焉著於京城內選擇吉地特建廟宇命名賢良祠春秋以時展祀其應入祠之人著大學士會同該部察明本朝滿漢文武大臣才德著聞完名全節者詳慎開列具奏請旨將來繼起

之臣亦並得沾被恩光永為盛典是年遵

旨議准以怡賢親王允祥大學士公謚文襄圖海一等公

謚襄毅賴塔大學士謚文端張英尚書謚文端顧

八代尚書馬爾漢尚書謚恭毅趙申喬河道總督

謚文襄靳輔河道總督謚勤恪齊蘇勒總督謚清

端楊宗仁巡撫謚清端陳瓚入祀賢良祠十年

諭賢良祠之王大臣應各立小傳以紀生平事蹟是年奉

旨以將軍謚僖恪阿爾納都統馮國相大學士謚文肅范

文程大學士謚文成榜式達海大學士謚文清阿  
蘭泰大學士謚文襄李之芳大學士謚文端吳璵  
大學士謚文貞張玉書大學士謚文貞李光地大學  
士謚文恭富寧安大學士謚文端張鵬翮領侍  
衛內大臣一等公福善一等公謚襄壯費揚古尚  
書謚文恪勵杜納尚書徐潮尚書謚端恪姚文然  
尚書謚敏果魏象樞尚書湯斌提督謚襄壯張勇  
提督謚忠勇王進寶提督謚襄武孫思克總督謚

襄忠趙良棟總督謚清端于成龍總督謚清端傅  
臘塔大學士謚文毅甯完我大學士魏裔介都統  
謚敏壯李國翰提督謚襄壯施琅將軍莽依  
圖一等公謚靖康愛星阿將軍佛尼勒總督謚忠  
毅孟喬芳大學士謚文恪額色黑大學士謚文靖  
王熙總督謚襄勤李國英都統謚襄壯褚庫巴圖  
魯領侍衛內大臣二等公尹德均入祀賢良祠十  
一年賢良祠工竣祠立

地安門外之西

御賜崇忠念舊匾額禮部會同工部太常寺堂官將王公大臣牌位入祠按次安設奏請遣官致祭得

旨賢良祠之王公大臣等著於本家各賜祭一壇又議令賢良祠諸臣入祠日後裔均齊集行禮春秋二季亦照例陪祀十二年奉

旨以大學士謚文端田從典大學士謚文恪高其位入祀  
乾隆元年正月



諭易名之典古昔所重我朝賜謚尤為謹嚴亦有當時未蒙錫予而追謚於數十年之後者蓋以事久論定協乎懿好之公也

皇考世宗憲皇帝風勵臣工肇舉賢良祠祀誠曠古鉅典其列祠者如一等公福善大學士魏裔介將軍佛尼勒莽依圖尚書湯斌徐潮馬爾漢等其歿時皆有卹而無謚朕思諸臣既與賢良之祠似宜邀易名之典其應否追謚之處著九卿會議具奏尋議上

予一等公福善謚恭懿大學士魏裔介謚文毅將軍佛  
尼勒謚恭靖將軍莽依圖謚襄壯都統馮國相謚  
桓僖尚書湯斌謚文正尚書徐潮謚文敬尚書馬  
爾漢謚恭勤是年奉

旨以尚書銜兼祭酒謚文定楊名時大學士謚文端朱  
軾內大臣一等男謚恪僖哈世屯尚書一等男謚

敏果米思翰入祀

謹按以下入祀王公大臣均由  
禮部題請取旨之後

入祠各於本家賜祭一  
次令翰林院照例立傳

五年以總督謚敏達李衛

入祀六年奉

旨以巡撫徐士林尚書謚文定徐元夢入祀十年禮部  
議奏前殿祀怡賢親王後祠四龕祀賢良諸臣五  
十八人請合為一龕首供世之最先者餘則左右  
分行各按世序爵大學士居前領侍衛內大臣次  
之尚書都統將軍總督前鋒統領護軍統領提督  
侍郎巡撫副都統以次安設至世爵有子男授尚  
書都統者有侯伯為侍郎副都統者應以尚書都

統秩為序以昭畫一從之十二年以大學士二等  
伯謚文穆馬濟大學士謚文端伊桑阿入祀十四  
年以總督謚愨勤那蘇圖入祀十五年以和碩超  
勇襄親王策凌都統謚襄烈傅清左都御史謚壯  
果拉布敦入祀禮部議準前殿五間中供怡賢親  
王位今超勇親王策凌入祀應設位前殿左次間  
十六年以總督謚文肅陳大受入祀十七年以巡  
撫謚敏惠潘思榘入祀二十年以大學士謚文端

福敏一等伯西路將軍謚武烈和起入祀二十二  
年以總督謚愨勤喀爾吉善總督謚文勤鶴年入  
祀二十三年以尚書謚文端汪由敦入祀二十四  
年以大學士伯謚文襄黃廷桂入祀二十六年以  
尚書謚勤恪李元亮大學士謚文恪蔣溥入祀二  
十八年以大學士謚文靖史貽直總督謚勤肅鄂  
弼大學士謚文莊梁詩正入祀二十九年以大學  
士謚文端來保協辦大學士一等武毅謀勇公謚

文襄兆惠入祀三十四年以尚書果毅公謚襄壯  
阿里衮入祀三十五年以大學士一等忠勇公謚  
文忠傅恒入祀三十六年以大學士謚文端尹繼  
善入祀三十七年以總督謚勤毅吳達善入祀三  
十八年以大學士謚文定劉綸大學士謚文正劉  
統勳入祀三十九年以尚書銜謚文端錢陳羣巡  
撫謚恭惠何燭入祀四十二年以大學士謚文襄  
舒赫德入祀四十四年以大學士謚文端高晉入

祀按是年以大學士謚文襄于敏中四十八年以  
入祀五十二年奉旨撤出

總督謚清愨袁守侗大學士謚文肅英廉入祀四  
十九年以巡撫謚恭毅李湖入祀凡賢良祠祭儀具

大清通禮

雙忠祠

乾隆十六年四月

諭駐藏大臣等奏朱爾墨特那木扎爾自立名號潛遣  
其心腹堅叅扎錫等通款準噶爾稱策旺多爾濟那

木扎爾為汗且求其發兵至拉達克地方以為聲援  
幸值準夷內潰所遣使人回藏被獲得其逆書並餽  
獻諸物是其陰蓄異志勾結準夷罪不容誅設非都  
統傅清左都御史拉布敦協力同心決計先發則其  
貽害藏地將不可言是二臣之心甚苦而有功於國  
家甚大應特建雙忠祠合祀二人春秋致祭丕昭勸  
忠令典傅清既有專祠著不必從祀家廟尋禮部遵  
旨會同內務府建祠於崇文門內春秋致祭



旌勇祠

乾隆三十三年二月

諭將軍公明瑞夙秉忠誠歷著勲績昨命統兵進勦緬  
匪明瑞身先士卒屢挫賊鋒乃以懸軍深入而額爾  
登額等有心逗遛後援不繼因於猛腊地方保護諸  
軍身留殿後衝冒矢石以致受傷身殞已降旨加恩  
優卹並入祀昭忠祠以酬忠蓋從前駐藏大臣傅清  
拉布敦鋤凶死事曾敕建雙忠祠秩在祀典茲明瑞

勤事捐軀義烈尤堪嘉尚著循前例於京師特建專祠舉行歲祀其先後陣亡之都統扎拉豐阿護軍統領觀音保總兵李全王玉廷均予入祠從祀用慰忠魂所有應錫祠名及建祠事宜各該衙門察例具奏尋建祠於

地安門外之西

賜名曰旌勇三十四年奉

諭據經畧大學士傅恒等奏總兵德福攻打賊寨勇往

爭先受傷陣亡等語德福身先士卒奮勉捐軀深為軫惻著入祀旌勇祠

功臣專祠

順治十一年十月

諭禮部定南武壯王孔有德審時率衆航海來歸屢建功績迨朕平定天下有德勦巨寇靖南服開闢廣西勲勞懋著不意桂林之役衆寡不敵靖忠自矢竟以身殉義烈允彰稽考舊典有立祠致祭之例爾部詳察具奏尋

議建祠於廣寧門外春秋致祭得

旨允行並

命以定南王妃白氏李氏配饗

康熙十八年三月

諭禮部自古帝王敦重倫常篤念勲舊必有褒嘉之典以  
示推恩孝昭皇后德著椒宮母儀天下懿範如在每切  
追思其父過必隆簪纓世裔宣力累朝忠殫謀猷功存  
弼亮沉篤生賢淑佐理宮闈宜加表揚垂諸久遠已敕

所司特為建立祠堂其妻縣主夙懋溫恭克昭家訓宜  
並祔享朕親製碑文勒之貞珉告成之日應賜諭祭祠  
建於安定門外歲以春秋遣官致祭

雍正元年三月

命建定南將軍一等公謚勤襄佟圖賴安北將軍內大臣  
都統一等公謚忠勇佟國綱領侍衛內大臣一等  
公謚端純佟國維祠祠在朝陽門外祠內三案勤  
襄公佟圖賴居中以一品夫人覺羅氏配忠勇公

佟國綱左以一品夫人他塔刺氏溫都氏配端純  
公佟國維右以一品夫人赫舍里氏配歲以春秋  
遣官致祭是年

命建一等公大學士謚文襄圖海祠祠在德勝門外祠內  
一案以一品夫人覺爾禪氏鈕祜祿氏配歲以春  
秋遣官致祭

乾隆二年

命歲祭宏毅公額亦都祠祠在安定門外春秋諏吉即

其本宗祠遣官致祭十四年三月

諭人子報本之忱必念爾祖國家酬庸之典爰及所生  
大學士公傳恒夙夜宣猷贊襄機務前因金川番蠻  
不靖丹誠奮發自請督師維時朕以其世篤忠貞服  
勞王家鍾慶椒塗聯輝懿戚悉由乃祖乃父積厚流  
光誕茲良弼陞辭之際朕欲加恩賜立祠堂秩於祀  
典大學士公傳恒奏稱臣仰蒙高厚榮賁先人實出  
至願如果憑仗天威肅清荒徼凱旋之日擬當懇請

殊恩今威信遠孚番酋效順膚功克奏美著旂常宜  
考彝章以示優錫其照勲臣額亦都佟國維之例敕  
建宗祠春秋致祭增光俎豆用獎忠勲尋建祠於東  
安門內正祠五間太子太保內大臣議政大臣內  
務府總管一等男追封一等公謚恪僖哈世屯居  
中以一品夫人覺羅氏配戶部尚書內務府總管  
一等男追封一等公謚敏果米思翰左以一品夫  
人穆溪覺羅氏博爾濟吉特氏配一等男兼察哈



爾總管追贈一等公謚壯愨李榮保右以一品夫  
人覺羅氏配春秋諏吉遣官致祭三十五年十一

月

諭前以大學士忠勇公傅恒體國公忠鞠躬盡瘁已降  
旨入祀賢良祠復念傅恒曩者金川奏績時以其祖  
父世篤忠貞流光鍾慶曾諭令建立宗祠自其曾祖  
哈世屯以下定為春秋致祭今傅恒自應令其一體  
入祠酬庸俎豆至尚書果毅公阿里衮宣力殫忱克

彰勞勩昨歲賜卹時曾令入祀賢良祠今思其先世  
額亦都遏必隆並以崇勲建有宗祠得膺祀典阿里  
衮亦宜附食邀榮而其父領侍衛內大臣尹德尚未  
列入著與阿里衮一併入遏必隆宗祠用獎勲蓋該  
部即照例行

盛京賢王祠

乾隆十九年九月

諭朕由吉林至盛京周覽山川形勝敬稽

實錄所載仰見

列祖締造艱難維時宗室諸王克奮忠勤功成百戰開國  
翊運之勲彪炳簡冊深切景念思盛京為龍興重地  
國初諸王功烈懋著如此並宜建祠以酬舊勲而示  
來許此地現有怡親王祠應將

太廟配享之通達郡王武功郡王慧哲郡王宣獻郡王及  
禮烈親王饒餘親王鄭簡親王穎毅親王一併崇祀  
即命曰賢王祠令所司春秋致祭應行典禮該部詳

議以聞祠內碑文可移於正中鑄勒此旨永昭我朝  
宗功元祀之鉅典四十三年八月大學士等遵

旨議奏睿親王豫親王肅親王克勤郡王一并入祀  
盛京賢王祠從之儀具

大清通禮

蘭州忠勇祠

雍正九年正月

命建忠勇祠於蘭州以祀西征陣亡將士

世宗憲皇帝諭曰朕命以酒三爵遙酌陣亡將士鄂善將  
酒齋往軍營凡陣亡將士每名以羊一隻奠祭宣朕憫  
惻傷悼至意儀具

大清通禮

臣等謹按以上所列並皆

特建祠宇列於羣祀者至直省祀典附載於後

直省所在神祠

臣等謹按直省禦災捍患諸神於民有功德者加

封號立專祠謹按年月先後彙次如左

順治三年以黃河著異加

封浙人謝緒為顯佑通濟之神廟祀江南宿遷縣

互見山川門

康熙十九年六月以平定臺灣

封海神天妃為護國庇民妙靈昭應弘仁普濟天妃遣官

詣福建莆田縣致祭

雍正三年六月浙江撫臣疏請廟祀江海保障諸

神乃

封春秋吳國上大夫伍員為英衛公廟祀錢塘縣唐吳越

王錢鏐為誠應王廟祀臨安縣宋張夏為靜安公

廟祀蕭山縣明紹興知府湯紹恩為寧江伯廟祀

紹興府四年河臣奏言明工部尚書宋禮開會通

河用汶上老人白英策分水濟運事載史冊舊有

廟祀請加封號乃

封宋禮為寧漕公白英為永濟之神於汶上縣祠廟祭之

五年九月四川撫臣疏稱都江堰口廟祀李二郎

有功蜀地請加封號下禮部議言史記漢書載蜀  
守李冰鑿離堆穿三江功績可考灌縣志內有使  
其子二郎鑿山穿江之語元至順初曾加封號今  
應並崇祀典請

封李冰為敷澤興濟通佑王其子二郎為承績廣惠顯英  
王廟祀灌縣從之八年加

封浙江顯佑侯戴繼元為保濟顯佑侯廟祀德清縣又  
封故廣東雷州府海安營水師副將姜起龍為英祐驍騎



將軍之神廟祀徐聞縣海口十二年以江西鄱陽湖舊祀唐代忠臣張巡

封為顯佑安瀾之神廟祀浮梁縣

乾隆二年加

封天妃為護國庇民妙靈昭應弘仁普濟福佑羣生天后三年四月以河臣疏言河神靈應

封河南人黃守才為靈佑襄濟之神廟祀陳留縣四年四月河臣疏言清口廟神張祥濟漕有應

封為彰靈衛漕之神廟祀清河縣八年

封故蜀漢裨將武當為顯佑英濟廣福王廟祀廣西義

寧縣二十二年加

封天后為護國庇民妙靈昭應弘仁普濟福佑羣生誠  
感咸孚天后四十七年三月以陳留河神舊封靈  
佑襄濟王屢著靈應奉

旨於其子孫內賞給奉祀生一人世傳勿替又以順治  
年間總河朱之錫功著南豫二省沒為河神屢著

靈應

封為助順永寧侯今有司照例致祭

直省聖賢忠烈名臣祠墓

康熙二十年二月

聖祖仁皇帝詣

盛京

駐蹕灤州日遣官往伯夷叔齊廟行禮

諭曰伯夷叔齊古之聖人清風可仰爾等前往可焚香展

敬三十六年

西巡至陝西奉

諭趙良棟乃為國宣力之臣來朝經過其門遣皇長子及部院諸臣往奠致祭一次陳福曾為國効力適至此地亦著致祭一次

乾隆十五年八月

皇上巡幸中州於

御道所經三十里內前代名臣忠烈先賢祠墓遣官

致祭名臣以從祀

帝王廟者為斷如伊尹周公許遠呂蒙正范仲淹司馬  
光王曾韓琦岳飛九人先賢以從祀

聖廟者為斷如子貢韓愈程顥程頤邵雍朱子許衡七  
人其祠墓均遣官祭醊又如殷比干墓漢關帝墓  
晉嵇紹祠唐顏真卿墓並以忠義卓越千古一體  
遣官致祭又直隸省

御道所經三十里內有唐宋璟墓

國朝魏裔介墓一以從祀

帝王廟一以入祀賢良祠均照例遣祭十六年

聖駕南巡遣官於山東祭

元聖周公廟於江南祭周秦伯季札言子游晉卞壺

宋曹彬范仲淹宗澤韓世忠明常遇春方孝孺

國朝于成龍傅臘塔湯斌張伯行陳鵬年等祠墓於

浙江遣官祭唐陸贄錢鏐宋岳飛明于謙王守仁

國朝徐潮等祠墓皆如中州遣祀之例二十二年二

十七年三十年

聖駕南巡凡

御道所經三十里內先賢忠烈名臣祠墓均遣祭如  
例

特命以故大學士徐本入祀本省賢良祠並遣官致祭  
其墓四十五年四十九年

聖駕南巡

御道所經三十里內聖賢忠烈名臣祠墓均遣祭如

例

直省賢良祠

雍正十年二月

諭我朝從前文武大臣持躬正直奉職公忠樹績建勲完  
名全節者朕已降旨於京師建賢良祠永遠展祀因思  
外任大臣鎮撫封疆宣猷布化忠勇效命威愛宜民其  
政績卓然可紀者若於身故後立賢良祠俾永膺祀典  
既足慰兵民懿好之公亦足為後來居官者之勸如近



日將軍蔡良提督張起雲總兵蘇大有魏翦國皆素有  
賢聲勤勞王事而歿於官者允宜在賢良之列著直省  
各於省會之地立祠其與祀之人追溯從前恐稽查未  
確或致濫膺即從近年為始而後有應請入祠者該督  
撫於一人具一本請旨不必彙奏

直省忠義節孝等祠

雍正二年

諭旌表節義給銀建坊民間往往視為具文未曾建立恐

日久仍至泯沒不能使民間有所觀感著於學宮內建忠義祠一所立石碑一通於學宮附近處購買基地建節孝祠一所立大牌坊一座其石碑牌坊將前後忠孝節義之人悉標姓氏於其上已故者設牌位於祠中春秋祭祀用闡幽光以垂永久

直省祭厲

順治初年定直省府州縣各立厲壇於北郊府稱郡厲縣稱邑厲咸以有司承祭

親王郡王家廟

臣等謹按杜典宗廟門有諸侯大夫士宗廟一條  
今以臣下家廟應退附吉禮之末我

朝親王郡王皆令立家廟蓋即古者諸侯立廟之禮  
至品宦之家祭及士庶之寢薦載在

大清通禮者亦即古者大夫士庶家祭之禮謹稽定制  
具載於篇

崇德元年定宗室封王者立家廟致祭

順治五年定宗室封王無嗣者於

大廟後殿兩廡祔祭有嗣者令其子孫立廟致祭又定莊

親王立一廟禮親王巽親王謙郡王共立一廟肅

親王立一廟饒餘郡王端重親王共立一廟穎親

王顯承郡王共立一廟豫郡王立一廟克勤郡王

衍禧郡王共立一廟

雍正九年定怡賢親王立一廟凡親王郡王廟制

廟七間南向中五間為堂左右二間為夾室堂後

楹以北分五室中奉始封之王世世不祧高曾祖  
禰依世次為二昭二穆昭東穆西親盡則祧由昭  
祧者藏主於東夾室由穆祧者藏主於西夾室庭  
繞以垣南為中門又南為廟門左右各設側門東  
西廡各三間東藏遺衣冠西藏祭器樂器廟重簷  
丹楹彩楠綠瓦紅堊壁階凡三出陛各七級門繪  
五色花草出陛如之焚帛壺在中門之內庭東南  
隅封牲房在中門之外西間歲以四時仲月諏吉

祭其始封祖及高曾祖禰五世仲春之祭並出祧  
主合食儀具

大清通禮

貝勒貝子宗室公家廟

貝勒貝子宗室公家祭立廟五間南向中三間為  
堂後楹以北分五室奉始封祖暨高曾祖禰兩旁  
為夾室奉始封而下親盡祧主廟及大門均綠瓦  
紅堊壁階五級廟不重檐門不備采餘如前制儀

具

大清通禮

品官家廟

品官家祭立廟於居室之東一品至三品官廟五  
間中三間為堂左右各一間隔以墻北為夾室南  
為房堂南檐三門房南檐各一門階五級庭東西  
廡各三間東藏遺衣物西藏祭器庭繚以垣南為  
中門又南為外門左右各設側門四品至七品官

廟三間中為堂左右為夾室為房階三級東西廡

各一間餘制與三品以上同

世爵公侯伯子視一品男以下按品為差

等八九品廟三間中廣左右狹階一級堂及垣皆

一門庭無廡以篋分藏遺衣物祭器陳於東西房

餘與七品以上同

在籍進士舉人視七品拔歲副貢生視八品

堂後楹

北設四室奉高曾祖禰四世皆昭左穆右妣以嫡

配南向高祖以上親盡則祧遷室祔廟均依昭穆

之次東序西序為祔位伯叔祖之成人無後者伯



叔父之成人無後及其長殤十六歲至十九歲者兄弟成人

無後及其長殤中殤

十二歲至十五歲

者妻先歿子姓成人

無後及其長殤中殤下殤

九歲至十一歲

者皆以版按行

年墨書男統於東女統於西東西向歲以春夏秋  
冬仲月擇吉致祭儀具

### 大清通禮

庶士寢薦

庶人附

庶士

貢監生員有頂帶者

家祭於寢堂之北為龕以板別為

四室奉高曾祖禰皆以妣配位如前儀南嚮前設  
香案總一服親男女成人無後者按行年書紙位祔  
食男東女西事至則陳已事焚之不立版歲以春  
夏秋冬節日出主而薦庶人家祭於正寢之北為  
龕奉高曾祖禰神位歲逢節序薦新儀具

大清通禮

皇朝通典卷五十